

**Joseph Kurup Harap Isu Kalimah Allah Oleh Marino Dianggap Selesai  
Bernama  
17 Julai, 2013**

PUTRAJAYA, 17 Julai (Bernama) -- Menteri di Jabatan Perdana Menteri Tan Sri Joseph Kurup berharap isu kalimah Allah yang disuarakan Duta Vatican City ke Malaysia Biskop Joseph Marino dianggap selesai demi perpaduan negara.

Selaku menteri yang bertanggungjawab dalam hal ehwal perpaduan dan integrasi nasional, beliau mengucapkan terima kasih kepada semua pihak yang bekerjasama dan menunjukkan semangat tinggi bagi menangani isu itu.

"Justeru saya menyeru kepada pihak-pihak tertentu supaya bersama-sama memantapkan perpaduan serta meningkatkan persefahaman yang lebih erat melalui perbincangan dan persefahaman bersama agar suasana yang lebih harmonis di negara ini dapat dikekalkan," katanya dalam kenyataan akhbar di sini Rabu.

Marino dalam wawancara pertamanya dengan sebuah portal berita tempatan baru-baru ini menyatakan bahawa beliau menyokong pendirian gereja Katholik di Malaysia berhubung isu penggunaan kalimah Allah oleh penganut Kristian di negara ini.

Kenyataannya telah menyinggung umat Islam di Malaysia dan berikutan itu satu permohonan maaf telah dibuat oleh Marino dengan Menteri Luar Datuk Seri Anifah Aman di Wisma Putra Selasa.

Kurup meminta isu yang dibangkitkan itu, yang merupakan kes rayuan di mahkamah, diserahkan kepada pihak mahkamah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=964070>